



Na osnovu člana 2.9 stav (1) tačka 19. Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), a u skladu s članom 8. stav (1) i članom 10. Pravilnika o postupku imenovanja i razrješenja predsjednika i članova biračkih odbora u Bosni i Hercegovini ("Službeni glasnik BiH", br. 32/26 i 41/26), Centralna izborna komisija Bosne i Hercegovine raspisuje

JAVNI KONKURS

za prijavu kandidata za imenovanje predsjednika/zamjenika predsjednika biračkog odbora u osnovnim izbornim jedinicama u Bosni i Hercegovini

I. Opće napomene

Objavljuje se Javni konkurs za prijavu kandidata za imenovanje predsjednika/zamjenika predsjednika biračkog odbora u osnovnim izbornim jedinicama u Bosni i Hercegovini.

Kandidat za predsjednika/zamjenika predsjednika biračkog odbora ne smije biti član političke stranke niti obavljati dužnost u organima političke stranke, udruženja ili fondacije organizaciono ili finansijski povezanim s političkom strankom, niti smije biti uključen u bilo kakve aktivnosti političke stranke i mora biti u mogućnosti da obavlja svoje dužnosti na politički nepristrasan način.

II. Osnovne dužnosti i prava predsjednika /zamjenika predsjednika biračkog odbora

Predsjednik biračkog odbora:

- obavezan je pohađati obuku i testiranje koje organizuje Centralna izborna komisija Bosne i Hercegovine;
- rukovodi radom biračkoga odbora i zajedno s članovima biračkog odbora odgovara za zakonitost rada na biračkom mjestu;
- osigurava integritet procesa glasanja i održava mir i red na biračkom mjestu i u njegovoj okolini;
- određuje dužnosti svakom članu biračkoga odbora;
- popunjava sve potrebne obrasce;
- osigurava da na biračkom mjestu ne bude oružja ili opasnih predmeta;
- rješava sva pitanja koja se odnose na identifikaciju i pravo glasa birača;
- pomaže biračima kojima treba dodatno objašnjenje o procesu glasanja;
- evidentira u Zapisnik o radu biračkog odbora vrijeme i okolnosti svih izuzetnih događanja na biračkom mjestu.

Zamjenik predsjednika biračkog odbora ima iste dužnosti ako je predsjednik biračkog odbora odsutan prilikom glasanja i/ili brojanja glasačkih listića.

Predsjednik/zamjenik predsjednika biračkog odbora ima pravo na naknadu za svoj rad. Visinu naknade određuje Centralna izborna komisija Bosne i Hercegovine.

III. Uslovi koje kandidati moraju ispunjavati

Opći i posebni uslovi koje moraju ispunjavati kandidati:

Opći uslovi

1. Kandidat mora biti lice s pravom glasa tj. da je upisano u Centralni birački spisak Bosne i Hercegovine (da je starije od 18 godina, da je državljanin Bosne i Hercegovine i da ima prijavljeno prebivalište u Bosni i Hercegovini).
2. Da posjeduje zdravstvenu sposobnost za obavljanje poslova i radnih zadataka koji se traže Javnim konkursom.
3. Za predsjednika/zamjenika predsjednika biračkog odbora ne može biti imenovano lice:
 - koje se ne može kandidirati u smislu odredbi članova 1.6, 1.7 i 1.7a Izbornog zakona Bosne i Hercegovine;
 - koje je nosilac izabranog mandata ili je član izvršnog organa vlasti, osim u slučajevima kada je kandidat za predsjednika/zamjenika predsjednika osoba iz člana 2.12 stav (4) Izbornog zakona Bosne i Hercegovine;
 - koje je aktuelni kandidat ili je bio kandidat za bilo koji nivo vlasti na posljednjim Općim i posljednjim Lokalnim izborima;
 - kojem je izrečena kazna za radnju koja predstavlja težu povredu izbornih zakona ili propisa za koju je lično odgovorno, u posljednje četiri godine, računajući od dana pravosnažnosti odluke i
 - protiv kojeg je pokrenut krivični postupak.

Posebni uslovi

1. Da ima prebivalište u osnovnoj izbornoj jedinici za koju se imenuje birački odbor;
2. Da ima najmanje završenu srednju školu, odnosno IV ili V stepen stručne spreme (po mogućnosti da je student, apsolvent) ili da posjeduje VSS;
3. Da mu nije izrečena sankcija Centralne izborne komisije Bosne i Hercegovine u skladu s članom 2.3 stav 1. tačka 5. Izbornog zakona Bosne i Hercegovine.

IV. Potrebna dokumentacija

1. Prijava na Javni konkurs (popunjen propisani obrazac);
2. Vlastoručno potpisana i ovjerena od nadležne izborne komisije izjava kandidata da se na njega ne odnose odredbe člana 2.3. Izbornog zakona Bosne i Hercegovine. Izborna komisija zadržava original izjave, a fotokopiju uručuje kandidatu, koji je dužan istu skenirati i učitati u aplikaciju
3. Fotokopija diplome ili uvjerenja o završenom fakultetu, višoj i/ili srednjoj školi, odnosno potvrda visokoškolske ustanove o statusu studenta ili potvrda o zaposlenju u obrazovnoj ustanovi na poslovima edukatora.

V. Objava Javnog konkursa

Javni konkurs bit će objavljen na službenoj internetskoj stranici Centralne izborne komisije BiH, u tri dnevna lista, na društvenim mrežama Facebook, Instagram i platformi X na kojim Centralna izborna komisija BiH ima otvorene službene profile, na internetskim stranicama općina/gradova/distrikta odnosno općinskih/gradskih izbornih komisija/Izborne komisije Brčko Distrikta BiH, kao i na oglasnim pločama općina/gradova/distrikta.

VI. Rok i način podnošenje prijava

Javni konkurs je otvoren 15 (petnaest) dana od dana objave na internetskoj stranici Centralne izborne komisije BiH www.izbori.ba.

Prijave na Javni konkurs s potrebnim dokazima o ispunjavanju navedenih uslova dostavljaju se Centralnoj izbornoj komisiji BiH putem elektronske aplikacije „JAVNI KONKURS za imenovanje predsjednika/zamjenika predsjednika biračkog odbora u osnovnim izbornim jedinicama u Bosni i Hercegovini - jul 2026 (15.07.2026 - 30.07.2026)“ koja je dostupna na internetskoj stranici Centralne izborne komisije BiH www.izbori.ba.

VII. Postupanje sa prijavama

Neuredne, nepotpune i neblagovremene prijave neće se razmatrati.

Dokumentacija priložena uz prijavu na Javni konkurs neće se vraćati podnosiocima prijava.

VIII. Organ za provođenje postupka

Postupak imenovanja predsjednika i zamjenika predsjednika biračkog odbora provest će Centralna izborna komisija BiH po okončanju Javnog konkursa, u skladu s utvrđenom procedurom.

IX. Imenovanje predsjednika/zamjenika predsjednika biračkog odbora

Nakon isteka roka za objavu Javnog konkursa Centralna izborna komisija Bosne i Hercegovine će formirati Listu prijavljenih kandidata, koja uključuje podatke o blagovremenosti prijave, te o ispunjenosti općih i posebnih uvjeta.

Svi kandidati obavezni su pristupiti obuci i testiranju koje organizuje Centralna izborna komisija Bosne i Hercegovine.

X Ostale informacije

Za sve dodatne informacije zainteresirani kandidati mogu se obratiti putem kontakt-telefona Sekretarijata Centralne izborne komisije Bosne i Hercegovine na broj: 033/251-331 i 033/251-332.